

Malaysia berpotensi munculkan pemain utama ekonomi digital



Kata Kampus

Oleh MOHD AMMYRUL ASHRAF SAIRAN

DASAR tarif yang diperkenalkan oleh Presiden Amerika Syarikat (AS), Donald Trump telah mencipta gelombang kejutan dalam landskap ekonomi global dengan kesan mendalam yang masih berterusan hingga kini.

Langkah proteksionis ini bukan sahaja mengganggu aliran perdagangan antarabangsa tetapi turut meningkatkan risiko stagflasi, senario ekonomi paling ditakuti yang menggabungkan inflasi tinggi, pertumbuhan ekonomi lembap dan peningkatan kadar pengangguran.

Di Malaysia, kesan domino dasar ini amat ketara khususnya dalam sektor teknologi dan pembangunan kecerdasan buatan (AI) yang sangat bergantung kepada import komponen elektronik dari China dan AS. Dari perspektif Islam, dasar perdagangan tidak seimbang ini bercanggah dengan prinsip keadilan ekonomi dan keseimbangan yang menjadi teras muamalah Islam.

Ancaman stagflasi yang dilingatkan oleh Jerome Powell, Pengerusi Federal Reserve semakin membimbangkan memandangkan dasar tarif Trump terus menaikkan kos perdagangan dan mengganggu rantaian bekalan global. Data terbaru menunjukkan penghantaran kontena dari China ke AS telah merosot sebanyak 18 peratus sejak awal April 2024 dan dijangka menyusut lagi sehingga 37 peratus menjelang pertengahan Mei.

Keadaan ini mengingatkan kita kepada krisis minyak 1970-an yang mencetuskan gelombang inflasi global. Dasar 'America First' Trump yang memaksa negara memilih antara AS atau China sebagai rakan dagang utama merupakan pendekatan tidak realistik memandangkan dominasi China dalam rantaian bekalan global.

Pada 2024, China telah menjadi rakan dagang utama bagi hampir semua benua termasuk Asia, Afrika dan Amerika Latin, menjadikan sebarang usaha mengasingkannya sebagai langkah berisiko tinggi.

Bagi Malaysia yang sedang giat membangunkan ekosistem AI dan transformasi digital, gangguan rantaian bekalan global akibat dasar tarif ini menimbulkan cabaran besar. Kebanyakan komponen elektronik dan perkakasan teknologi diimport dari China dan AS. Kenaikan kos akibat tarif menyebabkan pelaburan dalam bidang AI menjadi



MALAYSIA juga perlu mempelaburkan rizab mata wang. - GAMBAR HIASAN

semakin mahal.

Situasi ini secara langsung menjejaskan daya saing syarikat teknologi tempatan dan memperlambat pelaksanaan inisiatif penting seperti Pelan Induk Transformasi Digital Negara (MyDIGITAL).

Ketidaktentuan ekonomi global turut menyebabkan pelabur asing lebih berhati-hati yang boleh mengurangkan aliran pelaburan langsung asing ke dalam sektor teknologi Malaysia. Dalam jangka panjang, jika stagflasi benar-benar terjadi, keupayaan kerajaan dan syarikat swasta untuk melabur dalam penyelidikan serta pembangunan AI akan terjejas teruk, sekali gus menjejaskan aspirasi Malaysia untuk menjadi pusat teknologi Islamik yang progresif.

Dari perspektif Islam, dasar perdagangan tidak adil seperti tarif unilateral ini jelas bertentangan dengan prinsip keadilan dan keseimbangan dalam muamalah. Islam menekankan pentingnya keadilan dalam urusan ekonomi dan menolak segala bentuk eksploitasi atau penindasan yang boleh menimbulkan ketidakseimbangan sosial.

Dasar tarif Trump yang membebaskan ekonomi negara membanggakan seperti Malaysia boleh dianggap sebagai satu bentuk ketidakadilan yang menghalang pembangunan mampan. Tokoh ekonomi Islam terkemuka seperti Prof. Dr. Mohammad Hashim Kamali telah menegaskan bahawa kemajuan teknologi termasuk AI perlu selari dengan maqasid syariah. Dalam karyanya *Citizenship and Accountability of Government: An Islamic Perspective*, beliau menekankan bahawa

kebergantungan berlebihan kepada kuasa besar dalam teknologi boleh menjejaskan kedaulatan negara dan bertentangan dengan prinsip pemeliharaan akal (hifz al-'aql) dalam Islam.

Walaupun dasar tarif Trump dan ancaman stagflasi menimbulkan cabaran besar, ia juga membuka peluang untuk Malaysia memperkukuh ketahanan ekonomi dan teknologinya. Malaysia perlu meningkatkan pelaburan dalam penyelidikan tempatan dan memperkukuh kerjasama serantau bagi mengurangkan kebergantungan terhadap import teknologi.

Kerjasama erat dengan negara-negara ASEAN dalam pembangunan AI dan penciptaan rantaian bekalan alternatif boleh mengurangkan risiko gangguan perdagangan global. Pendekatan AI berteraskan syariah yang menekankan aspek etika Islam boleh menjadi nilai tambah Malaysia di peringkat antarabangsa.

Pendekatan ini memastikan AI digunakan untuk kebaikan masyarakat seperti dalam sistem kewangan Islam, pengurusan zakat dan pendidikan. Malaysia juga perlu mempelaburkan rizab mata wang dan mengukuhkan perdagangan dalam mata wang tempatan dengan rakan dagang utama bagi mengurangkan kebergantungan pada dolar AS yang semakin tidak stabil.

Dalam menghadapi ketidaktentuan ekonomi global, pelaburan dalam aset kukuh seperti emas juga perlu diberi pertimbangan serius. Sejarah membuktikan emas berfungsi sebagai pelindung nilai yang efektif semasa krisis stagflasi. Pada era 1970-an, harga emas pernah meningkat sehingga 26 kali ganda dan dalam situasi ekonomi tidak menentu sekarang, emas

dan komoditi lain boleh menjadi pilihan pelaburan lebih stabil.

Krisis semasa sebenarnya memberikan peluang untuk Malaysia mengkaji semula strategi ekonominya dan membina asas lebih kukuh bagi menghadapi cabaran masa depan. Dengan memperkukuh penyelidikan tempatan, memajukan AI berteraskan syariah dan mengurangkan kebergantungan kepada kuasa ekonomi tiada stabil, Malaysia berpotensi untuk munculkan sebagai pemain utama dalam ekonomi digital masa depan.

Hakikatnya, dasar perdagangan yang memaksa negara memilih antara AS atau China adalah tidak mampan dan berisiko tinggi. Kerjasama ekonomi yang adil dan inklusif, selari dengan prinsip Islam, merupakan jalan terbaik untuk menjamin kestabilan dan kemakmuran global jangka panjang.

Malaysia perlu bijak menavigasi gelombang ketidaktentuan ini dengan pendekatan strategik yang memanfaatkan kekuatan tempatan dan kerjasama serantau. Cabaran yang dihadapi sekarang sebenarnya boleh dijadikan sebagai permangkin untuk membina ekonomi lebih berdaya tahan dan berdaya, sekali gus merealisasikan visi.

Malaysia sebagai peneraju dalam pembangunan teknologi berteraskan nilai-nilai Islam. Dalam jangka panjang, pendekatan seimbang ini bukan sahaja akan memacu pertumbuhan ekonomi tetapi juga memastikan kemakmuran yang lebih adil dan berkekalan untuk semua.

PENULIS merupakan Pensyarah Kanan, Unit Pengajian Islam dan Falsafah Pusat Pengajian Bahasa, Tamadun dan Falsafah Kolej Sains dan Sastera, Universiti Utara Malaysia